



26. oktober 2012

Inatsisartut suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppakka:

- 1. Upernavimmi, Qaanaami, Kangaatsiami, Qeqertarsuarmi, Uummannami, Tasiilami, Ittoqqortoormiuni, Maniitsumi, Narsami, Paamiuni Nanortalimmilu taakkualu nunaqarfiini 2013-mi sanaartugassanik qassinik aningaasartalinnik pilersaarusiortoqarpa?**
- 2. Illoqarfinni pineqartuni taakkualu nunaqarfiini 2014-mut 2015-mullu aningaasat qassit sanaartugassanut immikkoortinneqarpat?**
- 3. 2013-mi illoqarfiit pineqartut nunaqarfiini illuliassat qassit pilersaarutigineqarpat 2014-mut 2015-mullu aningaasartaat ilanngullugit?**  
(Inatsisartuni ilaasortaq Hans Enoksen, Siumut)

**Tunnqavilersuut:**

Sinerissami illoqarfinni minnerusuni nunaqarfinnilu sanaartorneq ukiuni kingullerni unittoorluinnarsimavoq tamassumalu kinguneraa aamma illoqarfinni minnerusuni nunaqarfinnilu suliffissaaleqinerup annertoorujussuanngornera.

Illoqarfinni minnerusuni nunaqarfinnilu illut pitsaanngilluinnartut allaat najugaqarfissatut illersorneqarsinnaanngitsut najorneqarput allamik innuttaasut allanik illussaqqannginnamik.

Tamatta pingaartipparput peqqinnartumik inuuneqarnissarput, kisiannili sinerissami illut pitsaanngilluinnartut peqqinnanngilluinnartut allaat perusuersartarfeqqanngitsut uffarfeqqanngitsullu amerlaqisut atorneqarput, tamanna pingaartumik meeqqat inuusuttut inersimasullu eqqarsaatigalugit akuersaarneqarsinnaanngilaq!

Taamaattumik qulaani taasakka illoqarfiit nunaqarfittaasalu sanaartornikkut illuliornikkullu aningaasaliiffigineqarsimanerat apeqquteqarfigaara, ersarissumik kisitsisinngorlugit 2013-mut aammalu ukiunut tulliinut tassa 2014-mut 2015-mullu akineqaqqullugit.

Apeqqutima ullut qulit suliffiusut iluanni akineqarnissaat kissaatigaara.

Inuulluaqqusillunga

Hans Enoksen, Siumut